

**МОНГОЛ УЛСЫН ШАДАР САЙД, САНГИЙН САЙД, ХӨДӨЛМӨР, НИЙГМИЙН  
ХАМГААЛЛЫН САЙД, БОЛОВСРОЛ, ШИНЖЛЭХ УХААНЫ САЙД, ЭРҮҮЛ  
МЭНДИЙН САЙДЫН ХАМТАРСАН ТУШААЛ**

2020 оны 08 дугаар  
сарын 05-ны өдөр

Дугаар 78 / 149 / А/1674 / М / 1391

Улаанбаатар  
хот

Хичээл, сургалтын үйл ажиллагааг эхлүүлэх  
зарим арга хэмжээний тухай

Монгол Улсын Засгийн газрын тухай хуулийн 24 дүгээр зүйлийн 2 дахь хэсэг, Коронавируст халдвар /COVID-19/-ын цар тахлаас урьдчилан сэргийлэх, тэмцэх, нийгэм, эдийн засагт үзүүлэх сөрөг нөлөөллийг бууруулах тухай хуулийн 7 дугаар зүйлийн 7.1.1, 7.1.2 дахь заалт, Монгол Улсын Засгийн газрын 2020 оны “Боловсролын салбарт хэрэгжүүлэх арга хэмжээний тухай” 32 дугаар тогтоолыг тус тус үндэслэн ТУШААХ нь:

1. Бүх шатны боловсролын сургалтын байгууллагын хичээл, сургалтын үйл ажиллагааг үе шаттай эхлүүлэхтэй холбогдуулан эрсдэлээс урьдчилан сэргийлэхэд салбар дундын хамтын ажиллагаа, уялдаа холбоог сайжруулах, шаардлагатай журам, заавар, удирдамжийг баталж мөрдүүлэх, санхүү төсөв, дэд бүтэц, хүний нөөцийн бэлэн байдлыг хангаж ажиллахыг Боловсрол, шинжлэх ухааны дэд сайд Г.Ганбаяр, Хөдөлмөр, нийгмийн хамгааллын дэд сайд С.Зулпхар, Сангийн дэд сайд С.Мөнгөнчимэг, Эрүүл мэндийн дэд сайд Ш.Анхмаа нарт тус тус үүрэг болгосугай.

2. Хичээл, сургалтын үйл ажиллагаа удаан хугацаанд завсарласны улмаас багш, суралцагч, эцэг эх, асран хамгаалагчдад гарч болзошгүй айдас, түгшүүр, эргэлзээг тайлах, тайвшруулах нийгэм-сэтгэл зүйн нөлөөллийн үйл ажиллагааг гэр бүлд түшиглэн 2020 оны 8 дугаар сарын 1-ний өдрөөс хоёр сарын хугацаатай зохион байгуулах арга хэмжээ авч ажиллахыг Засгийн газрын Хэрэг эрхлэх газрын Хэвлэл мэдээлэлтэй харилцах хэлтэс /Ц.Ганзориг/, Гэр бүл, хүүхэд, залуучуудын хөгжлийн газар /М.Энх-Амар/, Сэтгэцийн эрүүл мэндийн үндэсний төв /Л.Насанцэнгэл/, Нийгмийн эрүүл мэндийн үндэсний төв /Д.Нарантуяа/-д тус тус даалгасугай.

3. Гамшгаас хамгаалах өндөржүүлсэн бэлэн байдлын зэрэгт шилжсэн нөхцөлд бүх шатны сургалтын байгууллагын үйл ажиллагааг үе шаттайгаар эхлүүлэхтэй холбогдуулан шаардагдах хөрөнгийн эх үүсвэрийг улс, орон нутгийн төсөв, олон улсын байгууллагын төсөл, хөтөлбөрийн хүрээнд шийдвэрлэх боломжийг судлан, холбогдох арга хэмжээ авч ажиллахыг Сангийн яам, Боловсрол, шинжлэх ухааны яам, Хөдөлмөр, нийгмийн хамгааллын яамны Төрийн нарийн бичгийн дарга нарт тус тус үүрэг болгосугай.

4. Төрийн болон төрийн бус өмчийн хөрөнгө оруулалт, олон улсын байгууллагын тусламжийн хөрөнгөөр хийгдэж буй барилга угсралт, их засвар, тохижилтын ажлыг хичээлийн жил эхлэхээс өмнө бүрэн дуусгах зохион байгуулалтын арга хэмжээ авч ажиллахыг Боловсрол, шинжлэх ухааны дэд сайд Г.Ганбаяр, Хөдөлмөр, нийгмийн хамгааллын дэд сайд С.Зулпхар, аймаг, нийслэлийн Засаг дарга нарт тус тус даалгасугай.

5. Цэцэрлэг, ерөнхий боловсролын сургууль, мэргэжлийн сургалт үйлдвэрлэлийн төв, политехник коллеж, их, дээд сургууль, коллежийн сургалтын төлбөр, хураамжийг эцэг эх, асран хамгаалагчдад санхүүгийн дарамт үүсгэхгүйгээр сар, улирлаар төлөх уян хатан зохицуулалт хийх арга хэмжээ авахыг их, дээд

сургуулийн консорциум, өмчийн бүх хэлбэрийн сургалтын байгууллагын удирдах ажилтан нарт үүрэг болгосугай.

6. Коронавируст халдвар (КОВИД-19)-аас урьдчилан сэргийлэх, халдварын эрсдэлээс хамгаалах, бэлэн байдлыг хангах чиглэлээр ариун цэврийн байгууламжийн хүртээмж, аюулгүй байдал, орчны эрүүл ахуйг сайжруулах, гар угаах нөхцөлийг бүрдүүлэхэд онцгойлон анхаарч ажиллахыг Боловсрол, шинжлэх ухааны дэд сайд Г.Ганбаяр, Хөдөлмөр, нийгмийн хамгааллын дэд сайд С.Зулпхар, аймаг, нийслэлийн Засаг дарга нарт даалгасугай.

7. Цэцэрлэг, ерөнхий боловсролын сургуулийн багш, ажилтан, их, дээд сургууль, коллежийн бакалаврын хөтөлбөрт өдрөөр элсэн суралцах оюутан, мэргэжлийн сургалт үйлдвэрлэлийн төв, политехник коллежийн суралцагчийн эрүүл мэндийн урьдчилан сэргийлэх үзлэг, цэцэрлэгт хамрагдах хүүхдийг эрүүл мэндийн шинжилгээнд хамруулах ажлыг бөөгнөрөл үүсгэхгүйгээр зохион байгуулахыг Эрүүл мэндийн дэд сайд Ш.Анхмаа, аймаг, нийслэлийн Засаг дарга нарт даалгасугай.

8. Бүх шатны сургалтын байгууллагын халдваргүйжүүлэлтийг мэргэжлийн байгууллагаар хийлгэх, зөвлөгөө мэдээллээр хангах, холбогдох нийтлэг шаардлагуудыг баримтлах, хичээл эхлэх бэлэн байдалд хяналт тавьж ажиллахыг Эрүүл мэндийн дэд сайд Ш.Анхмаа, аймаг, нийслэлийн Засаг дарга, Мэргэжлийн хяналтын ерөнхий газар /Т.Гантулга/-т даалгасугай.

9. Тушаалын хэрэгжилтэд хяналт тавьж, мэргэжил, арга зүйн удирдлага, зохицуулалтаар хангаж ажиллахыг холбогдох яамдын Төрийн нарийн бичгийн дарга, Мэргэжлийн хяналтын ерөнхий газар /Т.Гантулга/-т тус тус үүрэг болгосугай.

10. Тушаалын хэрэгжилтийн явц, үр дүнг 2020 оны 8 дугаар сарын 20-ны өдөрт багтаан танилцуулахыг Боловсрол, шинжлэх ухааны дэд сайд Г.Ганбаяр, Хөдөлмөр, нийгмийн хамгааллын дэд сайд С.Зулпхар, Онцгой байдлын ерөнхий газрын дарга, бригадын генерал Г.Ариунбуян нарт тус тус даалгасугай.

